



Margrita Monn-Tuor

1920 - 2001

La Margrita Monn-Tuor ei naschida ils dus da fevrer 1920 a Rabius. Ella ei carschida si cun ses sis fargliuns en ina buna famiglia religiosa.

Mo sco ei mava lu, ha era la Margrita giu da bandunar gia cun 16 onns sia casa paterna e serender egl jester. Ella ei stada empau dapertut ed ha luvrau e segidau sco survienta el tener casa. Tier quellas famiglias, ch'eran per part beinstontas ha la Margrita empriu da far il percasa e da cuschinari, quei che ella fageva special bugen.

In di eis ella serabitschada ella Val Tujetsch. Cheu ha ella survegniu ina plazza sco cuschiniera el hotel Soliva. Diesch onns en buna campignia e bien clima da lavur. Denter auter ha ella era empriu d'enconuscher il giuven Ignazi Monn. Beinspert ein els stai fiug e flomma in per l'auter. La Margrita ed il Nazi ein sedecidi da far nozzas.

Igl onn 1952 ei igl emprem affon naschius, ina poppa ch'els han numnau Lisabet. Tgei tschaffen pils geniturs. Suenter suondan aunc tschun pignets, il Florentin, la Rusina, la Luzia, il Gabriel e la pintga Fabiola. Els dattan lavur ed aschia ha la mumma occupaziun detgavunda. La Margrita ei premurada da mussar a ses affons dad esser survetscheivels e da tener ault la paisch en famiglia ed ordlunder.

La mort dil fegl Florentin ch'era pér trenta onns, sco quella digl aug Lucas han tuccau la famiglia e mo la gronda cardientscha ha mitigau il mal e l'encarschadetgna.

Cun sisonta onns ha il cor dalla Margrita entschiet a far quitaus. Quei ha tementau ella fetg. En siu patratg semovan ils maletgs da ses fargliuns che ella haveva piars quasi tuts entras daguotas dil cor. La Margrita ha stuschau quels patratgs sin la vart ed ha supportau senza selamentar. Mo igl ei vegniu mender e mender. Mo ina operaziun sappi aunc gidar ella, havevan ils miedis detg. La Margrita ei semessa cun tut sia curascha egl auto ed ei serendida a Turitg nua che ella ha schau far quella hanada operaziun. Ella ha prolungiu sia veta per diesch onns.

En quels onns schenghegiai ha ella fatg enqual pelegrinadi tier Nossadunna. Ella ha era saviu guder ses beadis ed ei segidada bia gadas cun nus tuts sch'eい mava buca

agradora cun nus. Ella ha adina teniu tier a nus da far bia oraziun e rugar Maria per siu agid.

Tier tut sias miserias cun il cor ei in mal il venter cuntuau s'annunziaus ed era la malsogna dil zucher mulestava da bia ella. Pli liung e pli ditg ch'ei cuzzava e pli gronds ch'il mal vegneva. La Margrita ha stuiu serender a Glion el spital. Suenter diesch dis eis ella turnada a Sedrun mo ils mals vegnevan pirs. A Cuera el spital han ils miedis empruau da segidar cun la Margrita ed han operau ella. Las grondas dolurs che ella haveva stuiu supportar ils davos dis havevan spossau ella bia memia fetg. La Margrita ei semessa sin via encunter il parvis.

Cara Margrita, Ti eis stada fetg aviarta cun nus ed has empruau da capir nus era en quei temps modern e midau. Tiu bien cor has Ti teniu aviarts per nus entochen il di da Tia mort. Nus essan engrazieivels a Ti per Tia capientscha, per Tiu rir e che gest Ti eis stada nossa mumma, sira e tatta. Ti Margrita has enrihiu nossa veta cun Tia preschientscha. Nus lein engraziar fetg a Ti per tut.

Stai bein e sin seveser